



---

## Rapport annual 2015

Preziadas commembras, preziai commembers

Jeu haiel sespruau da tschentar ensemen in rapport che duess buca esser memia lungherus per ils auditurs ni lecturs.

A noss'emprema sesida da suprastonza dils 24 da fevrer essan nus vegni confruntai cun la nunspitgada demissiun dil cassier Silvio Caviezel. Anflar in successur ei stau tut auter che sempel. Negin ha seschau perschader da surpender quei uffeci. La finala ei Martina Caviezel ch'era revisura da quen sedeclarada da star a disposiziun sco cassiera e Silvio ei staus prompts da surpender la revisiun da quen. Domisdus ein vegni elegi unanim alla radunonza dil 10-04-2015. Quei ei stau in bien brat d'uffeci ed jeu engraziel a Martina sco a Silvio per lur beinvulientscha enviars noss'uniun.

Pertuccont contribuziuns ord il Fondo Greina ein 2 projects vegni susteni:

- las lavurs da manteniment dalla caplutta Sogn Gion a Vanescha cun 1000.00 frs.
- l'exposiziun da fotografias a Winterthur da Verner Solèr cun 800.00 frs.

Cun quella caschun engraziel jeu en num dall' uniun alla cumissiun dil Fondo Greina per lur lavur ch'ei buca adina mo sempl.

Per il viadi ella Svizra Centrala nua ch'igl ei vegniu festivau duront il temps da stad il giubileum: 700 onns Battaglia a Morgarten han buca mo 7 persunas mobein 31 s'annunziau. Quella gronda partizipaziun ha dau a nus anim da tschentar ensemen in variont program. Nus havein visitau treis loghens historics, Sviz, Steinen e Morgarten che stattan en connex cun la battaglia. Nies guid, Filip Vincenz, ha dau interessantas informaziuns sur fatgs historics. La buna cumpignia denter ils partiziponts ha caschunau ina stupenta atmosfera. Pieder Alig ha funcziunu sco fotograf. Per sia lavur engraziein nus ad el cun in applaus.

La suprastonza vegn mintgaton confruntada cun giavischs d'indigens ni da hosps da vacanzas. Aschia essan nus vegni fatgs attents sin treis munconzas:

- Anentasi maunchien bauns da seser sin vias e sendas.
- Il plaz da glatsch dado la casa da scola seigi buca vegnius preparaus pli dapi la fusiun, schegie ch'el era indicaus el prospect da turismus.
- La loipa Sutvitg el plaun Purdieni savessi era puspei vegnir preparada e forsa schizun prolungida entochen a Vrin Dado.

La suprastonza ha decidiu d'indicar quellas munconzas en ina brev alla vischnaunca Lumnezia. Enteifer 10 gis havein nus survegniu la suandonta risposta dil president da vischnunca, Duri Blumenthal:

### **Loipa a Sutvitg / Vrin Dado**

*Far ina Loipa a Vrin ei cumbinau cun la problematica da menar neutier la maschina per preparar e surtut per mantener la loipa. Nus havein denton registrau ch'il territori*

*necessari fuss avon maun e vegnin anavos sin quella pusseivladad en cass da munconza da neiv sin la loipa a Degen.*

### **Plaz da glatsch**

*Il plaz da glatsch a Vrin sa vegnir preparaus vinavon entras nies menaschi tecnic, aschilunsch che las cundiziuns meteorologicas lein tier quei.*

### **Bauns sin sendas da viandar**

*Il basegns per postar bauns per liung dallas sendas da viandar a Vrin vegn examinaus entras il menader dil survetsch tecnic communal e cumpletaus corrispudentamein.*

El decuors digl onn havein nus giu 3 sesidas da suprastonza. Denteren essan nus seradunai alla meisa rodonda ensemen cun la gruppa che lavura vid il project da numns locals. Nus havein constatau che la lavur da fotografar e dad indicar tut ils numns locals pretenda fetg gronda lavur. Evelyn Casanova, Silvio Caviezel e Pieder Alig ein s'edeclarai prompts da cotinuar lur lavur.

Sco finiziun engraziel jeu en emprem lingia a mes consuprastonts, Martina Caviezel e Ronnie Caminada, per lur cooperativa lavur. Jeu sperel ch'ei reusseschi a nus vinavon da luvrar bein ensemen.

Plinavon sauda in engraziament a tuts che han segidau sin ina moda ni l'otra. Vies engaschi, Vossas ideas ed oravontut Vossa partizipaziun ein da gronda valeta per noss'uniun. Jeu sperel che nus anflien era per 2016 pusseivladads da saver tgirar vinavon in' emperneivla cumminonza.

Vrin, ils 22-04-2016

la presidenta: Jovita Vincenz